

ფასი 3 კაპიკი.

გამოცემა ვიქტორ წულაძისა № 1.

ქინი  
(სკოლია)

# ქორეილი

სურათები

გურიის ცხოვრებიდან

30737



ტფილისი.

სტამბა ს. ლოსაბერიძისა, მოსკ. ქ. საკ. სახლი, 5.

1910



## სურათები

### გურიის ცხოვრებიდან.

ქესატობა, მოსავლის სიმცირე, განუწყვეტელი ავდრები, სიმინდის ჭია და იმავე დროს ქორწილი, ქორწილი და არა ქორწინება! აი, ჩვენებური ამბები, წლე-ვანდელის მეტის-მეტად მკლევ და უბარა-ქო შემოდგომის ბოლოსი!

ქორწილი და არა ქორწინება! ეს სიტყვები, ვიცი, გურულ მკითხველთა გარდა, ყველას ეუცხოვება, ყველას ეხამუშება გასაგონად. მაშ განვმარტოთ და გავარკვიოთ აი სახამუშო სიტყვათა ადგილობრივი მნიშვნელობა.

ქორწინება—ჯვრის წერაა, ერთი შვილთა საიდუმლოთაგანი, ხოლო ქორწილი კი—ეს აღარავისთვის საიდუმლო აღარ არის, ჩვენში მაინც—ქორწინების გამო გარდახდილი ნადიმია, რომელშიაც მონადიმემ იმდენი უნდა გარდაიხადოს, რომ ხარჯიც დაჰფაროს და თან მასპინძლის

„ოჯახიც გაამხიარულოს“, ე. ი. მასპინ-  
დელსაც მოსაგები უჩვენოს.

წელს ქორწილი ხშირია, შარშან და  
შარშანწინდელ ქორწინების გამო ქორ-  
წილის გარდახდა დალოცვილებს წელს  
მოჰგონებიათ და გეპატიუებიან: „მობძან-  
დით, ჩვენის ოჯახის მხიარულება გაინა-  
წილეთო“.

კარგი და პატიოსანი! მაგრამ ერთი ეს  
მიბძანეთ, ღვთის გულისათვის, თქვენს  
ოჯახში ნაყიდი მხიარულება ჩემს საკუ-  
თარს ოჯახში რომ დარდსა და მწუხარე-  
ბას, შულლსა და აღიაქოთს გამოიწვევს,  
ეს ვიღამ გაინაწილოს?

ამას გარდა, შარშან თუ შარშანწინ ქა-  
ლიშვილი გაგითხოვებია, ქმრის ოჯახში  
დაგიბინავებია, შვილიც მისცემია იქ და  
წელს, ამ ქესატობისა და უმოსავლობის  
დროს, ქორწილში მეპატიუები—ეს სადა-  
ური ნამუსია, სადაური ეხტიბარია?! სხვა  
გარდასახადები და ხარჯები არ ეყოფოდა  
ჩვენს ქვეყანას, რომ ეგ შენის ოჯახის

გამხიარულების გარდასახადიც არ მიგემატებინა?

მართალია, ქორწილი ახალი ამბავი არ არის ჩვენში, ის ძველადაც იცოდნენ, მაგრამ სხვა სახით და სხვანაირად. ქორწინების შემდეგ მაშინვე ქორწილი გაჩაღდებოდა, ქორწილში მხოლოდ დაახლოვებულს ნათესავებს და გულითად მეგობრებს დაუძახებდნენ. ახლა კი, თუ ეს სახელი და გვარი იციან შენი, ან სხვისგან გაუგონიათ, ქორწილში გეპატიჟებიან, „მობრძანდით, ჩემის ოჯახის მხიარულება გაინაწილეთო“.

მერე რაო, — იტყვის მკითხველი, — მინდა წავალ და მინდა არ წავალო. სხვაგან შეიძლება ასეც იყოს, ხოლო ჩვენში, სამწუხაროდ, სხვა რიგადაა საქმე. ვაი წასვლას და ვუი წაუსვლელობას!

დასაპატიჟებელ ბარათის კონვერტზე შენ სახელ-გვართან უეჭველად მიწერილი იქნება „თავის მეუღლითო“, ხოლო თუ ისე ბედნიერი ხარ, რომ მეუღლე აქა

გყავს, ისე უბედური მაინც როგორ იქნები, ან დედა, ან და, ან რძალი, ან დედათა სქესის ერთ-ერთი წარმომადგენელი არა გყავდეს ოჯახში. ასეთ შემთხვევაში კონვერტზე წარწერას ყოველთვის შესაფერი კუდი ექნება გამობმული. მოდი და ამის შემდეგ, თუ კარგი ვაჟკაცი ხარ, დამაგრდი სახლში, ებრძოლე ევის შთამომავალს. ქორწილში და ლხინში კი არა, ისეთი დღე დაგადგება, ჯოჯოხეთში, ნავთში და კუბრში წასვლაზე დასთანხმდები.

მუშაობიდან თუ მგზავრობიდან დაბრუნებისას, როცა ცოლი მხიარულად შემოგლიძებს, ეს იმის მომასწავებელია, რომ „ქორწილის წიგნი“ მოგსვლიათ და თქვენი დარბაისელი თანამესარეცლე ეხლავე შესდგომია მხიარულებას, რადგანაც კონვერტზე უკვე უბოვია და ამოუკითხავს სანატრელი სიტყვები „თავის მეუღლითო“.

ჰკითხულობთ წერილს, რომელიც ჩვეულებრივ ასე თავდება ხოლმე: „დავშთე-

ბი თქვენგან საუკუნოდ დავალებული ლაზარე ხინკალაძე“. ხსოვნას იკრებთ, მოსაზრებას იშველიებთ, მაგრამ ვერ გაგიხსენებიათ, ვერ მოგიაზრებიათ, თუ ვინ არის ეგ ლაზარე ხინკალაძე, რომლის ოჯახის მხიარულება ასე ჯადოსნურად გადმოსულა თქვენს ოჯახზე.

— ვინ არის, ადამიანო, ეგ ლაზარე ხინკალაძე, რომ ვერ მომიგონებია?—ეკითხებით ცოლს.

— რაფერი გულმავიწყი ხარ, კაცო! სწორეთ გასაკვირია შენი ამბავი! ლაზარე ხინკალაძე რაღა არ იცი, ელიობას მარინობაში\*) რომ ვნახეთ, ნობ-ფარდაგს ყიდულობდა. შარშან ქალიშვილი გავათხოვე, წრეულს მზითვი უნდა მივცე და ჩემი მტერ-მოყვარე ყველა უნდა დავპატიჟოვო.

— კი მაგრამ რა მოყვარეა ჩვენი?

— რაღა ჩივი, კაცო, რაღა რა მოყვარეა?!

---

\*) მარიობა, ანუ ნაგომრობა განთქმული ბაზრობაა გურიაში. ელიობა დღეს, 20 ივლისს, ამ ბაზრობაზე დიდძალი ხალხი იკრიბება.

ერთი ჩემი მკვიდრი ბიძათა შვილი იმის კარის მეზობელს ჰყავს მითხოული. დიდი ქორწილი აქ თურმე. ცაი და ქვეყანა დაუპატიჟებია. წუუსვლელობა რაღა გვარგია, საღა გავაჰყიროთ თვალი?

შეიძლება ასეთის შემთხვევის გამოუცდელი ბრძანდებით და წასვლაზე უარის თქმა გაჰბედეთ. არ გირჩევთ, რადგანაც ასეთს გაბედვას ცუდი შედეგი მოჰყვება. არ დაიჯერებთ? მაშ შეიტყვეთ და დასტკბით. დაუგველი სახლი, დაურეცხელი ჯამ-ჭურჭელი, გაუშლელი ლოგინი, უმარილო და ხშირად უხარშავი შეჭამადი, უმცხვარი მჭადი და ცოლის მუდმივი ბუზლუნი შემდეგის სანეტარ-ძილო შინაარსისა: „მე უბედური, მე უბედურ ვარსკვლავზე გაჩენილი! ამისთანა გათხოვას გუუთხოვარობა არ ჯობდი, ამისთანა ქმარს უქმრობა არ მერჩია! ტირილში ვერ წავალ, ქორწილში ვერ წავალ, მტერთან ვერ მივალ, მოყვარესთან ვერ მივალ... ქვეყანაში თვალს ვერ გავაჰყერ. ამისთა-



ნაი რა სიცოცხლე, რა სიკვტილი?... ფო-  
ტინე, მაკრინე, სოფიო, მარინე, ასინე,  
კასინე, მატრონე, ქრისტინე, ივლიტე,  
დესპინე, იგინი, აგინი, დიდი და პაწაი,  
კაი და ავი—ყველაი აპირებს ქორწილში  
წასვლას და მე ბედგადაწყვეტილი შინ  
უნდა ვეგდო, შინ უნდა დევირჩვა... ამი-  
სთანაი რა სიცოცხლე, რა სიკვტილი!  
ნეტამაინც კოჭლი ვიყო, ბრუტიანი ვი-  
ყო, ქაჩალი მჭირდეს, წელკავი მჭირდეს...  
სხვაზე ნაკლებათ გარება ვიციოდე, გამო-  
რება ვიციოდე... სხვებზე ნაკლებად სიტყვას  
ვიტყოდე, პასუხს ვიტყოდე... რაიზა არ  
ვარ მე ქორწილში გამოჩენის ღირსი...  
ამისთანაი რა სიცოცხლე, რა სიკვტილი!...

არ დაივიწყოთ, რომ ზემოდ ჩამოთვლილ  
ასინე-კასინეთა ლეგიონიც თავიანთ ქმრებს  
სწორედ ასეთ ძილის-პირებს უგალობებს  
და დანიშნულ დღეს, რაღა საკვირველია,  
ლაზარე ხინკალაძის ქორწილი ნაირ-ნაი-  
რის ქალ-კაცით ივსება. შუადღეზე დაპი-  
რებულის სადილის „მანიფესტი“ ბინდი-

სას ძლივს გამოვა. ზშირად თითო კერძის საჭმელის ჩამორიგებას ვერც კი მოასწრებენ, რომ ღამდება კიდევ და მასპინძლის გასამხიარულებლად მოწვეული ხალხი სახლში წასასვლელ-წამოსასვლელად აიშლება. ქორწილსაც, რა თქმა უნდა, ბოლო ედება და თქვენი ჭირი და სატკივარი მიაქვს.

ვინ იცის, მასპინძელი შეიძლება მართლაც გამხიარულებული რჩებოდეს ასეთის ქორწილის შემდეგ, ხოლო სტუმრებისა რა მოგახსენოთ...

სტუმრები, ცელქი შეგირდისა არ იყვეს, „ბეზაბედად“ რჩებიან, იმ განსხვავებით, რა თქმა უნდა, რომ ამ სასჯელთან ერთად მასპინძლის გასამხიარულებლად ჯარიმასაც იხდიან.

სად არის სათავე და დასაბამი ქორწილის ასეთნაირად გაბათალებისა, ნადიმის გათაღლითებისა და გაყალბებისა? რასაკვირველია, ქალიშვილის გათხოვის სიძნელე-სიძვირეში.

უდიდ-ქრთამოდ და უდიდ-მზითვოდ, ცოლს, ამ ახლანდელი დროის მძიმესა და აუტანელს ბარგს, არავინ იკიდებს ზურგზედ, ისე, როგორადაც ზოგიერთ გაზეთს „უპრემიოდ“ აღარავინ იწერს ხოლმე.

ცოლი ამ დროში სარჩენ, შესანახ და აზიზად მოსავლელ არსებად გადაიქცა ქმრისა და ოჯახისათვის. წინად, როგორც მოგეხსენებათ, იწოდებოდა მეუღლედ და ამ სიტყვის ქვეშ იგულისხმებოდა გამრჯელი, მშრომელი და ერთგული ამხანაგი ქმრისა და წევრი ოჯახისა.

დღევანდელი ცოლი „სარჩენად“ გაუხდა ოჯახს, წინანდელი მეუღლე კი „მრჩენელი“ იყო ოჯახისა. განსხვავება დიდია და ამ განსხვავებამ ახლანდელი ქორწილიც განასხვავა.

საკვირველია და თან სამწუხარო, რომ აღამიანი დღე-მუდამ და ჟამ-მუდამ ტრახობით თავს გვაბეზრებდეს: „კოჭლი არა ვარ და ბრუტიანი, ქაჩალი არა მჭირს და წელკავი, სიტყვა ვიცი და პასუხი, გარება

შემიძლიან და გამოვრებაო“ და იმავე დროს იგივე, თუ მისს სიტყვებს დავუჯერებთ, ფიზიკურად მაინც სრული და უნაკლო ადამიანი, „სარჩენი“ იყოს. დიად, საკვირველიცაა და სამწუხაროც, მაგრამ რა გაეწყობა?

ამბობენ, მრეწველობის აღორძინებამ, ქარხნების გამრავლებამ და აღებ-მიცემობის გავრცელებამ ქალებს ხელიდამ საქმე გამოაცალაო. მართალიცაა, თუმცა არც ისე სავსებით, როგორც ეს ზოგიერთებს წარმოუდგენიათ. დღეს რომ ქალი ძველებურად დგიმ-სავარცხალს მიუჯდეს, ხამისა და შალის ქსოვა დაიწყოს, მაგდენად არაფერი ხეირი იქნება, მაგრამ გარეშე ამისა ცოტა საქმეა ოჯახში გასაკეთებ-მოსაგვარებელი?

სხვას რომ თავი დავანებოთ, ერთი ეს მიბრძანეთ, ღვთის გულისათვის, რომელს ქარხანაში ამზადებენ ბოსტანს? სად, რომელს საფეიქროში ჰქსოვენ ოხრახუმსა და ნიახურს, პრასასა და ბოლოკს, წიწმატსა.

და წიწაკს? სად, რომელს „ზავოდში“ უნდა გავგზავნოთ ეზო და კარ-მიდამო დასაგველ-დასასუფთავებლად და ბაღლები დასაბან-დასავარცხნად?

თქვენ შეიძლება ხუმრობა გეგონოთ და მე კი ფაქტს მოგახსენებთ. დღეს მთელი სოფელი რომ სიგრძე-სიგანეზე შემოიაროთ, ერთს რიგიანს ბაღჩას ვერსად ვერ შეხვდებით. მეზობლებს ერთმანეთი თავ-მობეზრებული ჰყავთ: ერთი ოხრახუშს თხოულობს, მეორე პრასას, მესამე ნიახურს, მეოთხე და მეხუთე ქინძსა და წიწაკას. ავიწყდებათ კი დალოცვილებს, რომ ეს დოვლათი, ღვთის წყრომითაა თუ ღვთის წყალობით, კაი ხანია, აღარც ერთისას არ მოიპოვება.

ახლა ერთი ჩემი გამტყუნებიზა, სოფლის სკოლაშიაც შეიხედეთ. გაოცდებით, ამდენი ობოლი და უბატრონო ბავშვი ერთად თავ-მოყრილი რატომ ამდენხანს არ მინახავს სადმეო! ყველა დაუბანელი, ყველა დაურეცხელი, ყველა დაუვარცხნე-

ლი! სკოლაში რომ შედარებით მოზრდილი ბავშვები ასეთს არა-სასურველს სურათს წარმოადგენენ, რაღა სანატრელს დღეში იქნებიან სახლში უფრო პატარა ბალები, ეს თითონ თქვენ იგულისხმეთ და წარმოიდგინეთ.

ხოლო უკეთუ დღევანდელი დედა დვიძლს შვილს, საკუთარის სისხლით გასულიერებულს და ხშირად საკუთარის რძით გაზრდილს, სიფაქიზ-სისუფთავის მხრით ასე უდიერად ეპყრობა, ეზოსა და კარ-მიდამოს დაგვა-დაწმენდაზე რომ დიდად თავს არ შეიწუხებს, ესეც თქვენ თითონ უნდა მიხვდეთ და დაიჯეროთ.

განა ასეთნი იყვნენ წინანდელი დედები? ოღონდაც რომ არა ჯა ამიტომაც იყო, რომ მაშინ ქალიშვილის გათხოვა არც არავითარს სიძნელეს წარმოადგენდა.

მაშინ ირთავდნენ იმ აზრით, რომ ავშენდებით, გავკეთდებით და მოვლონიერდებითო. ახლა კი აშენებული და გაკეთებული ოჯახის პატრონიც დიდს ფიქრ-

სა და საგონებელია ჩავარდნილი ამ საკითხის შესახებ და ვერ გადაუწყვეტია—შეირთოს ცოლი თუ არა. პირველ შემთხვევაში იმისი ეშინია, ვაი თუ ჩემი გაკეთებული ოჯახი საფანელადაც არ ეყოს ცოლიანობას და შეძლებული კაცის სახელი გამიტყდესო, ხოლო მეორე შემთხვევაში უშვილოდ გადასვლისა ეფიქრება და... აქ თუ წერტილი არ დავსვი, მე რომ ჩემი ენის ამბავი ვიცი, შეიძლება ქალთათვის არა სასიამოვნო რამ წამოგროშოს. ისევ სჯობია, დავდუმდე და ამ საჭირობორბოტო საკითხის შესახებ იმათი (ქალების) აზრიც მოვისმინო\*).

კნინი

---

ეს წერტილი გაზ. „ივერიაში“ იყო დაბეჭ-

